

МОЛЕБНОЕ ПЕНИЕ О МИРЕ И ВОИНАХ

(Поётся всеми молящимися после отпуста воскресной литургии. Также благословляется для келейной молитвы)

Молитва Святому Духу

Царю Небесный, Утешителю, Душе истины, Иже везде сый и вся исполняй, Сокровище благих и жизни Подателю, прииди и вселися в ны, и очисти ны от всякия скверны, и спаси, Блаже, души наша.

Тропарь Кресту Господню, глас 4:

Спаси, Господи, люди Твоя, и благослови достояние Твое, победы на сопротивных даруя, и Твое сохраняя Крестом Твоим жительство.

Тропарь Казанской иконе Божией Матери, глас 4:

Заступнице усердная, Мати Господа Вышняго, за всех молиши Сына Твоего, Христа Бога нашего, и всем твориши спастися, в державный Твой покров прибегающим. Всех нас заступи, о Госпоже, Царице и Владычице, иже в напастех, и скорбех, и в болезнях обремененных грехи многими, предстоящих и молящихся Тебе умиленною душею и сокрушенным сердцем пред пречистым Твоим образом со слезами и невозвратно надежду имущих на Тя, избавления всех зол, всем полезная даруй и вся спаси, Богородице Дево: Ты бо еси Божественный покров рабам Твоим.

Тропарь всем Небесным Силам, глас 4:

Небесных воинств Архистратизи, молим вас присно мы недостойнии, да вашими молитвами оградите нас кровом крил невещественных вашей славы, сохраняюще ны припадающия прилежно и вопиющия: от бед избавите ны, яко чиновачальницы Вышних Сил.

Тропарь великомученику Георгию Победоносцу, глас 4:

Яко пленных свободитель и нищих защититель, немощствующих врач, православных поборник, победоносче великомучениче Георгие, моли Христа Бога спастися душам нашим.

Кондак иконе Богородицы "Всех скорбящих радости", глас 6:

Не имамы иныя помощи, / не имамы иныя надежды, / разве Тебе, Владычице. / Ты нам помози, / на Тебе надеемся / и Тобою хвалимся, // Твои бо есмы раби, да не постыдимся.

Тропарь Богородице:

Под Твою милость прибегаем, Богородице Дево, / молений наших не презри в скорбех, / но от бед избави нас, / Едина чистая и благословенная. Пресвятая Богородице, спаси нас. (трижды)

МОЛИТВА КО ГОСПОДУ О РУСИ

Господи Боже сил, Боже спасения нашего, призри в милости на смиренные рабы Твоя, услыши и помилуй нас: се бо брани хотящая ополчишася на Святую Русь, чающе разделить и погубити единый народ ея.

Возстани, Боже, в помощь людем Твоим и подаждь нам силою Твоею победу.

Верным чадам Твоим, о единстве Русския Церкви ревнующим, поспешествуй, в духе братолюбия укрепи их и от бед избави. Запрети раздирающим во омрачении умов и ожесточении сердец ризу Твою яже есть Церковь Живаго Бога, и замыслы их ниспровергни.

Благодатию Твоею власти предержающая ко всякому благу настави и мудростию обогати!

Воины и вся защитники Отечества нашего в заповедех Твоих утверди, крепость духа им низпосли, от смерти, ран и пленения сохрани!

Лишенные крова и в изгнании сущия в дома введи, алчущия напитай, недугующия и страждущия укрепи и исцели, в смятении и печали сущим надежду благу и утешение подаждь!

Всем же во дни сия убиенным и от ран и болезней скончавшимся прощение грехов даруй и блаженное упокоение сотвори!

Исполни нас яже в Тя веры, надежды и любве, возстави паки во всех странах Святой Руси мир и единомыслие, друг ко другу любовь обнови в людях Твоих, яко да единем усты и едином сердцем исповемся Тебе, Единому Богу в Троице славимому.

Ты бо еси заступление, и победа, и спасение уповающим на Тя и Тебе славу возсылаем, Отцу и Сыну и Святому Духу, ныне и присно, и во веки веков. Аминь.

+++